

摘藻堂四庫全書薈要

史部

欽定四庫全書薈要卷六千一百五十一

遼史卷二十六

元中書右丞相總裁托克托等修

本紀第二十六

道宗六

壽隆元年春正月己亥如混同江庚戌西南面招討司
奏博索摩來侵蕭阿魯岱等擊破之乙卯振奉聖州貧
民二月戊辰賜左右二皮室貧民錢癸酉高麗遣使來

貢乙亥駐蹕魚兒濼三月丙午賜東北路貧民絹夏四月丁卯額特埒奏討尼都格爾捷乙亥女直遣使來貢庚寅錄西北路有功將士五月乙未朔以左伊勒希巴耶律托多為特哩袞南京宣徽使耶律特默為北院大王癸卯贈陣亡者官丁巳駐蹕囉特哩嶺六月己巳以知奚六部大王事和勒博為本部大王權參知政事趙孝嚴為漢人行宮都部署圍場都管薩巴以討準布功加鎮國大將軍癸巳準布長約勒岱及塔瑪噶來貢秋七

月庚子準布長敏達蘇等來貢癸卯獵沙嶺癸丑巴哩
巴部來附進方物甲寅額特埒奏討磨古斯捷九月甲
寅祠木葉山丙辰詔西京礮人弩人教西北路漢軍冬
十月甲子駐蹕藕絲淀甲戌以北面林牙耶律大悲努
為右伊勒希巴癸未以參知政事王師儒為樞密副使
漢人行宮都部署趙孝嚴參知政事壬辰錄討準布有
功將士十一月丙申女直遣使進馬己亥以都統額特
埒為西北路招討使封漆水郡王甲辰夏國進貝多葉

佛經庚申高麗王昱疾命其子顥權知國事十二月癸亥朔以知北院樞密使事耶律阿蘇為北院樞密使是年放進士陳衡甫等百三十人

二年春正月甲午如春水癸卯西南面招討司討博索摩破之乙卯駐蹕錫訥蘇辛酉市牛給烏爾古德呼勒威烏爾古部貧民二月癸亥振達瑪林巴克部夏四月己卯振西北邊軍六月辛酉駐蹕薩拉納秋七月甲午準布來貢丙午獵赤山八月乙丑巴哩巴部進馬九月

丙午徙烏爾古德呼勒部于烏納水以扼北邊之衝冬
十月戊辰駐蹕藕絲淀庚辰高麗遣使來貢十二月己
未額特埒討默爾吉破之壬戌南府宰相耶律都勒幹
致仕癸亥以蕭托卜嘉為北府宰相耶律大悲努殿前
都點檢乙亥夏國獻宋俘

三年春正月丁亥如春水壬寅烏爾古部節度使耶律
辰嘉努以功加尚書右僕射癸卯駐蹕雙山二月丙辰
南京水遣使振之閏月丙午準布長穆色克尼木巴克

長托果斯默爾吉長呼喇巴等請復舊地貢方物從之
三月辛酉燕國王延禧生子賜名塔魯妃父長格遷左
監門衛上將軍仍賜官屬錢是春高麗王昱薨夏四月
南府宰相趙廷睦出知興中府事參知政事牛溫舒兼
同知樞密院事五月癸亥額特埒討準布破之己巳駐
蹕薩拉納六月甲申詔罷諸路馳驛貢新丙戌詔每冬
駐蹕之所宰相以下構宅毋役其民辛丑夏人來告宋
城要地遣使之宋諭與夏和庚戌以契丹行宮都部署

耶律烏頁為南院大王秋七月壬子朔獵黑嶺八月己亥博羅滿達部長率其民來歸乙巳彗星見西方九月壬申駐蹕藕絲淀丁丑以武定軍節度使梁援為漢人行宮都部署戊寅額特埒奏討默爾吉捷己卯五國部長來貢冬十月庚戌以西北路招討使額特埒為南府宰相十一月乙卯博羅滿達部來貢戊午以安車召醫巫閭山僧志達己未以中京留守韓資讓知樞密院事同知南院樞密使事蕭藥師努知右伊勒希巴事丁丑

西北路統軍司奏討默爾吉捷

四年春正月壬子如魚兒濼己巳徙準布等貧民于山

前辛未宋遣使來饋錦綺三月庚午幸春州丙子有司

奏黃河清夏四月辛丑以雨罷獵五月癸酉納延奏北

邊捷甲戌駐蹕薩拉納六月戊寅朔夏國為宋所攻求

援丁亥以遼興軍節度使聶呼為特哩袞前知特哩袞

事即律果桑為南京統軍使甲午以參知政事牛溫舒

兼知中京留守事秋七月戊午如黑嶺冬十月乙亥朔

駐蹕藕絲淀己卯以南府宰相額特埒兼契丹行宮都
部署以傅燕國王延禧十一月乙巳朔知右伊勒希巴
事蕭藥師努樞密直學士耶律儼使來諷與夏和辛酉
夏復遣使求援十二月壬辰為燕國王延禧行再生禮
曲赦三百里內囚

五年春正月乙巳如魚兒灤乙丑詔夏國王李乾順伐
博索摩等部夏五月壬戌藥師努等使來迴奏來罷兵
癸亥謁乾陵戊辰以南府宰相額特埒兼西北路招討

使禁軍都統己巳駐蹕沁柳湖六月甲申以奚六部大

王和勒博為契丹行宮都部署知右伊勒希巴事蕭藥

師努南面林牙兼知契丹行宮都部署事乙未五國部

長來朝戊戌準布來貢己亥以興聖宮使赫嘉努為右

伊勒希巴秋七月壬寅提克德長托迪來貢辛亥如達

里庫山閏九月丙子駐蹕都爾嘉冬十月己亥朔高麗

王顥遣使乞封冊丁巳額特埒奏討尼都格爾捷丙寅

以同知南京留守事蕭德勒岱知北院樞密使事丁卯

宋遣郭知章曹平來聘戊辰振遼州饑仍免租賦一年十一月甲戌振南北二紂乙酉夏國以宋罷兵遣使來謝十二月甲子以參知政事趙孝嚴為漢人行宮都部署漢人行宮都部署梁援為遼興軍節度使

六年春正月癸酉南院大王耶律烏貢薨壬午以太師致仕托海起為奚六部大王丁亥如春水辛卯額特埒執磨古斯來獻丙申詔問民瘼二月丁未以烏爾古部節度使辰嘉努為南院大王己酉磔磨古斯于市癸丑

出絹賜五院貧民辛酉宋遣使告宋主煦殂弟佶嗣位
即遣使弔祭三月甲申弛朔州山林之禁夏四月丁酉
朔日有食之癸卯如炭山五月壬午烏爾古部討察察
哩破之乙酉漢人行宮都部署趙孝嚴薨丙戌駐蹕納
克灤辛卯宋饋先帝遺物乙未以東京留守和囉木薩
噶為特哩袞南院宣徽使蕭常格為漢人行宮都部署
六月庚子遣使賀宋主辛丑以有司案牘書宋主嗣位
為登寶位詔奪宰相鄭顥以下官出顥知興中府事韓

資讓為崇義軍節度使御史中丞韓君義為廣順軍節度使癸丑準布長來貢戊午遣使決五京滯獄己未以遼興軍節度使梁援為樞密副使秋七月庚午如沙嶺壬申尼都格爾諸部寇西北路八月額特埒以兵敗之使來獻捷九月癸未望祠木葉山戊子駐蹕藕絲淀冬十月壬寅以樞密副使王師儒監修國史癸卯五國諸部長來貢甲寅以平州饑復其租賦一年十一月壬申以天德軍民田世榮三世同居詔官之令一子三班院

祇候丙子名醫巫閭山僧志達設壇內殿戊子夏國王
李乾順遣使請尚公主十二月乙未女直遣使來貢己
亥以知右伊勒希巴事赫嘉努為北面林牙辛亥詔燕
國王延禧擬注大將軍以下官庚申鐵驪來貢宋遣使
來謝帝不豫是歲封高麗王顥為三韓國公放進士康
秉儉等八十七人

七年春正月壬戌朔力疾御清風殿受百官及諸國使
賀是夜白氣如練自天而降黑雲起于西北疾飛有聲

北有青赤黑白氣相雜而落癸亥如混同江甲戌上崩
于行宮年七十遺詔燕國王延禧嗣位六月庚子上尊
謚曰仁聖大孝文皇帝廟號道宗

贊曰道宗初即位求直言訪治道勸農興學救蓄恤患
粲然可觀及夫謗訕之令既行告訐之賞日重羣邪並
興讒巧競進賊及骨肉皇基寢危衆正淪胥諸部反側
甲兵之用無寧歲矣一歲而餽僧三十六萬一日而祝
髮三千徒勤小惠蔑計大本尚足與論治哉

遼史卷二十六

遼史卷二十六考證

壽隆元年夏四月乙亥三年二月丙辰朔閏月丙午五年春正月乙丑六年十一月壬申 按歷象志朔考

壽隆元年四月丙寅朔三年二月丙辰朔閏月丙戌朔五年正月甲辰朔六年十一月癸亥朔原文乙亥訛己亥丙辰訛甲辰乙丑訛乙巳壬申訛壬寅並以干支推算改正至丙午為閏二月之二十一日史未

書閏并增

以知奚六部大王事和勒博為本部大王 按和勒博
舊作回離保此又作回里不係一人今畫一改

遼史卷二十六考證

欽定四庫全書薈要卷六千一百五十二

遼史卷二十七

元中書右丞相總裁托克托等修

本紀第二十七

天祚皇帝一

天祚皇帝諱延禧字延寧小字阿果道宗之孫父順宗
大孝順聖皇帝母貞順皇后蕭氏太康元年生六歲封
梁王加守太尉兼中書令後三年進封燕國王大安七

年總北南院樞密使事加尚書令為天下兵馬大元帥
壽隆七年正月甲戌道宗崩奉遺詔即皇帝位于樞前
羣臣上尊號曰天祚皇帝二月壬辰朔改元乾統大赦
詔為耶律伊遜所誣陷者復其官爵籍沒者出之流放
者還之乙未遣使告哀于宋及西夏高麗乙巳以北府
宰相蕭烏納為遼興軍節度使加太傅三月月丁卯詔
有司以張孝傑家屬分賜羣臣甲戌召僧法頤放戒于
內庭夏四月旱六月庚寅朔如慶州甲午宋遣王潛等

來弔祭丙申高麗夏國各遣使慰奠戊戌以南府宰相
額特埒兼南院樞密使庚子追謚懿德皇后為宣懿皇
后壬寅以宋魏國王和囉噶為天下兵馬大元帥乙巳
以北平郡王淳進封鄭王丁未北院樞密使耶律阿蘇
加裕悅辛亥葬仁聖大孝文皇帝宣懿皇后于慶陵秋
七月癸亥準布鐵驪來貢八月甲寅謁慶陵九月壬申
謁懷陵乙亥駐蹕藕絲淀冬十月壬辰謁乾陵甲辰上
皇考昭懷太子諡曰大孝順聖皇帝廟號順宗皇妣曰

貞順皇后十二月戊子以樞密副使張琳知樞密院事翰林學士張奉珪參知政事兼同知樞密院事癸巳宋遣黃寔來賀即位丁酉高麗夏國並遣使來賀己巳詔先朝已行事不得陳告初以英格為生女直部節度使其俗呼為太師是歲英格死傳于兄之子武雅淑武雅淑死其弟阿固達襲

二年春正月如鴨子河二月辛卯如春州三月大寒冰復合夏四月辛亥詔誅伊遜黨徙其子孫于邊發伊遜

德勒岱之墓剖棺戮屍以其家屬賜被殺之家五月乙丑額特埒獻尼都格爾等部捷六月壬辰以雨罷獵駐蹕散水原丙午夏國王李乾順復遣使請尚公主丁未南院大王辰嘉努致仕壬子李乾順為宋所攻遣李造福田若水求援閏月庚申策賢良壬申降惠妃為庶人秋七月獵黑嶺以霖雨給獵人馬準布來侵額特埒等戰敗之冬十月乙卯蕭哈里叛劫乾州武庫器甲命北面林牙赫嘉努捕之蕭哈里奔拜珠水阿克展部丙寅

以南府宰相耶律額特埒為北院樞密院參知政事牛
溫舒知南院樞密使事十一月乙未赫嘉努以不獲蕭
哈里免官壬寅以上京留守耶律慎思為北院樞密副
使有司請以帝生日為天興節

三年春正月辛巳朔如混同江女直至蕭哈里首遣使
來獻戊申如春州二月庚午以武清縣大水弛其陂澤
之禁夏五月戊子以獵人多亡嚴立科禁乙巳清暑齊
老嶺丙午謁慶陵六月辛酉夏國王李乾順復遣使請

尚公主秋七月中京雨雹傷稼冬十月甲辰如中京已
未吐蕃遣使來貢庚申夏國復遣使求援己巳有事于
觀德殿十一月丙申文武百官加上尊號曰惠文智武
聖孝天祚皇帝大赦以宋魏國王和魯幹為皇太叔梁
王塔魯封燕國王鄭王淳為東京留守封越國王百官
各進一階丁酉以特哩袞耶律和羅木薩為南院大王
戊戌以受尊號告廟乙巳謁太祖廟追尊太祖之高祖
曰昭烈皇帝廟號肅祖妣曰昭烈皇后曾祖曰莊敬皇

帝廟號懿祖妣曰莊敬皇后召監修國史耶律儼纂太祖諸帝寔錄十二月戊申如藕絲淀是年放進士馬恭回等百三人

四年春正月戊子幸魚兒灤壬寅獵木嶺癸卯燕國王塔魯薨二月丁丑布古德遣使來貢夏六月甲辰駐蹕旺國崖甲寅夏國遣李造福田若水求援癸亥吐蕃遣使來貢秋七月南京蝗庚辰獵南山癸未以西北路招討使事蕭迪里為北院樞密副使耶律慎思並知北院

樞密使事辛卯以同知南院樞密使事蕭迪里為西北
路招討使冬十月己酉鳳凰見于遼陰己未幸南京十
一月乙亥御迎月樓賜貧民錢十二月辛丑以張琳為
南府宰相

五年春正月乙亥夏國遣李造福等來求援且乞伐宋
庚寅以遼興軍節度使蕭常格為北府宰相丁酉遣樞
密直學士高端禮等諷宋罷伐夏兵二月癸卯微行親
民疾苦丙午幸鴛鴦灤三月壬申以族女南仙封成安

公主下嫁夏國王李乾順夏四月甲申射虎炭山五月
癸卯清暑南崖壬子宋遣曾孝廣王戡報聘六月甲戌
夏國遣使來謝及貢方物己丑辛哈爾吉秋七月謁慶
陵九月辛亥駐蹕藕絲淀乙卯謁乾陵冬十一月戊戌
禁商賈之家應進士舉丙辰高麗三韓國公王顥薨子
侯遣使來告十二月己巳夏國復遣李造福田若水求
援癸酉宋遣林洙來議與夏約和

六年春正月辛丑遣知北院樞密使蕭德勃岱知南院

樞密使事牛溫舒使宋諷歸所侵夏地夏五月清暑散

水原六月辛巳夏國遣李造福等來謝秋七月癸巳準

布來貢甲午如黑嶺庚子獵鹿角山冬十月巳亥宋興

夏通好遣劉正符曹穆來告庚辰以皇太叔南京留守

和囉噶兼特哩袞東京留守越王淳為南府宰相十一

月巳未以釋迦努為南院大王瑪努勤為奚六部大王

丙申行朵冊禮戊戌大赦以和囉噶為義和仁聖皇太叔

越王淳進封魏國王封皇子額魯溫為晉王實納埒為

饒樂郡王己亥謁太祖廟甲辰祠本葉山十二月己巳
封耶律儼為漆水郡王餘官進爵有差

七年春正月釣魚于鴨子河二月駐蹕大魚濼夏六月
次散水原秋七月如黑嶺冬十月謁乾陵獵醫巫閭山
是年放進士李石等百人

八年春正月如春州夏四月丙申封高麗王侯為三韓
國公贈其父顯為高麗國王五月清暑散水原六月壬
辰西北路招討使蕭迪里率諸蕃來朝丙申射柳祈雨

壬寅夏國王李乾順以成安公主生子遣使告來丁未
如黑嶺秋七月戊辰以雨罷獵冬十二月己卯高麗遣
使來謝

九年春正月丙午朔如鴨子河二月如春州三月戊午
夏國以宋不歸地遣使來告夏四月壬午五國部來貢
六月乙亥清暑特哩嶺秋七月隕霜傷稼甲寅獵于哈
爾吉八月丁酉雪罷獵冬十月癸酉望祀木葉山丁丑
詔免今年租稅十二月甲申高麗遣使來貢是年放進

士劉禎等九十人

十年春正月辛丑預行立春禮如鴨子河二月庚午朔

駐蹕大魚樂夏四月丙子五國部長來貢丙戌預行再

生禮癸巳獵于北山六月甲戌清暑玉丘癸未夏國遣

李造福等來貢甲午準布來貢秋七月辛丑謁慶陵閏

月辛亥謁懷陵己未謁祖陵壬戌皇太叔和囉噶薨九

月甲戌免重九節禮冬十月駐蹕藕絲淀十二月己酉

改明年元是歲大饑

天慶元年春正月釣魚于鴨子河二月如春州三月乙亥五國部長來貢夏五月清暑散水原秋七月獵冬十月駐蹕藕絲淀

二年春正月己未朔如鴨子河丁丑五國部長來貢二月丁酉如春州辛混同江釣魚界外生女直酋長在千里內者以故事皆來朝適遇頭魚宴酒半酣上臨軒命諸酋次第起舞獨阿固達辭以不能諭之再三終不從他日上密謂樞密使蕭奉先曰前日之燕阿固達意氣

雄豪顧視不常可託以邊事誅之否則必貽後患奉先
曰麓人不知禮義無大過而殺之恐傷向化之心假有
異志又何能為其弟武奇邁尼雅滿瑚寔等嘗從獵能呼
鹿刺虎搏熊上喜輒加官爵夏六月庚寅清暑南崖甲
午和州回鶻來貢戍戍成安公主來朝甲辰準布來貢
秋七月乙丑獵南山九月己未射獲熊燕羣臣上親御
琵琶初阿固達混同江燕歸疑上知其異志遂稱兵併
旁近部族女直卓克莫阿固齊拒之阿固達虜其家屬

二人走訴咸州詳衮司送北樞密院樞密使蕭奉先作
常事以聞上仍送咸州詰責欲使自新後數召阿固達
竟稱疾不至冬十月辛亥高麗三韓國公王侯之母死
來告即遣使致祭起復是月駐蹕奉聖州十一月乙卯
幸南京丁卯謁太祖廟是年放進士韓昉等七十七人
三年春正月丙寅賜南京貧民錢丁卯如大魚灤甲戌
禁僧尼破戒丙子獵狗牙山大寒獵人多死三月籍諸
道戶徙達里庫山圍場地居民于別土阿固達一日率

五百騎突至咸州吏民大驚翌日赴詳袁司與卓克算等面折庭下阿固達不屈送所司問狀一夕遁去遣人訴于上謂詳袁司欲見殺故不敢留自是召不復至夏閏四月李弘以左道聚衆為亂支解分示五京六月乙卯烏梁海國遣使來貢良犬丙辰夏國遣使來貢秋七月辛秋山九月駐蹕藕絲淀十一月甲午以三司使虞融知南院樞密使事西南面招討使蕭樂古為南府宰相十二月庚戌高麗遣使來謝致祭癸丑回鶻遣使來

貢甲寅以樞密直學士馬人望參知政事丙辰知樞密院事耶律儼薨癸亥高麗遣使來謝起復

四年春正月如春州初女直起兵以赫舍哩部人阿蘇不從遣其部薩該討之阿蘇弟達呼布來告詔諭使勿討不聽阿蘇來奔至女直遣使來索不發夏五月清暑散水原秋七月女直復遣使取阿蘇不發乃遣侍御阿息保問境上多建城堡之故女直以慢語答曰若還阿蘇朝貢如故不然城未能已遂發渾河北諸軍並東北

路統軍司阿固達與弟尼雅爾滿實等謀以尼楚赫伊
呼羅索棟摩等為帥集女直諸部兵擒遼障鷹官及攻
寧江州東北路統軍司以聞時上在慶州射鹿聞之畧
不介意遣海州刺史高仙壽統渤海軍應援蕭托卜嘉
遇女直戰于寧江東冬十月壬寅以守司空蕭嗣先為
東北路都統靜江軍節度使蕭托卜嘉為副發契丹奚
軍三千人中京禁兵及土豪二千人別選諸路武勇二
千餘人以虞侯崔公義為都押官控鶴指揮邢頴為副

引軍屯出河店兩軍對壘女直軍潛渡混同江掩擊遼
衆蕭嗣先軍潰崔公義邢穎耶律佛哩蕭噶克寔等死
之其獲免者十七人蕭奉先懼其弟嗣先獲罪輒奏東
征潰軍所至劫掠若不肆赦恐聚為患上從之嗣先但
免官而已諸軍相謂曰戰則有死而無功退則有生而
無罪故士無鬪志望風奔潰十一月壬辰都統蕭迪里
等營于沃稜濛東又為女直所襲士卒死者甚衆甲午
蕭迪里亦坐免官辛丑以西北路招討使耶律鄂爾多

為行軍都統副點檢蕭伊實同知南院樞密使事耶律
章努副之十二月咸賓祥三州及鐵驪烏色皆叛入女
直伊實往援賓州南軍諸將實喇塔喇等往援咸州並
為女直所敗

欽定四庫全書舊要卷六千一百五十三

遼史卷二十八

元中書右丞相總裁托克托等修

本紀第二十八

天祚皇帝二

五年春正月下詔親征遣僧嘉努持書約和斥阿固達
名阿固達遣薩喇復書若歸叛人阿蘇遷黃龍府於別
地然後議之都統耶律鄂爾多等與女直兵戰于達里

庫城敗績二月繞州渤海古裕等反自稱大王三月以
蕭色佛呼等討之遣耶律章嘉努等六人齎書使女直
斥其生名冀以速降夏四月癸丑蕭色佛呼等為渤海
古裕所敗以南面副部署蕭托斯和為都統赴之五月
托斯和及古裕戰敗績章嘉努等以阿固達書來復遣
之往六月己亥朔清暑特哩嶺壬子章嘉努等還阿固
達復書亦斥名諭之使降癸丑諭諸道親征丙辰托斯
和招獲古裕等癸亥以特哩袞耶律摩哩為北院大王

是月遣蕭色埤使女直以書辭不屈見留秋七月辛未
宋遣使致助軍銀絹丙子獵于嶺東是月都統鄂爾多
等與女直戰于白馬濼敗績八月甲子罷獵趨軍中以
鄂女多等軍敗免官丙寅以圍場使鄂博為中軍都統
耶律章嘉努為都監率蕃漢兵十萬蕭奉先統御營都
統諸行營都部署耶律章努為副以精兵二萬為先鋒
餘分五部為正軍貴族子弟千人為硬軍扈從百司為
護衛軍北出駱駝口以都點檢蕭呼塔喝為都統樞密

直學士柴誼為副將漢步騎三萬南出寧江洲自長春
州分道而進發數月糧期必減女直九月丁卯朔女直
軍陷黃龍府已已知北院樞密使蕭德裕出為西南
面招討使色埒還女直復遣薩喇以書來報若歸我叛
人阿蘇等即當班師上親征尼雅滿烏珠等以書來陽
為卑哀之辭寶欲求戰書上上怒下詔有女直作過大
軍翦降之語女直主聚衆務面仰天慟哭曰始與汝等
起兵蓋苦契丹殘忍欲自立國今主上親征奈何非人

死戰莫能當也不若殺我一族汝等迎降轉禍為福諸
軍皆曰事已至此惟命是從乙巳耶律章努反奔上京
謀迎立魏國王淳上遣駙馬蕭昱領兵詣廣平淀護后
妃行宮實達爾伊遜馳書報魏國王王時章努先遣王妃
親弟蕭迪里以所謀說魏國王王曰此非細事主上自
有諸王當立北南面大臣不來而汝言及此何也密令
左右拘之有頃伊遜等齎御札至備言章努等欲廢立
事魏國王立斬蕭迪里等首以獻單騎間道詣廣平淀

待罪上遇之如初章努知魏國王不聽率麾下掠慶曉
懷祖等州結渤海羣盜衆至數萬趨廣平淀犯行宮順
國女直阿固齊以三百騎一戰而勝擒其貴族二百餘
人竝斬首以徇其妻子配役繡院或散諸近侍為婢餘
得脫者皆奔女直章努詐為使者欲奔女直為邏者所
獲縛送行在腰斬于市剖其心以獻祖廟支解以徇五
路冬十一月遣駙馬蕭特默林牙蕭察喇等將騎兵五
萬步卒四十萬親軍七十萬至馳門十二月乙巳耶律

章嘉努叛戊申親戰于和卜多岡敗績盡亡其輜重已
未錦州刺史耶律珠展叛應章嘉努庚申北面林牙耶
律瑪古討章嘉努癸亥以北院宣徽使蕭罕嘉努知北
院樞密使事南院宣徽使蕭特默為漢人行宮都部署
六年春正月丙寅朔東京夜有惡少年十餘人乘酒執
刃踰垣入留守府問留守蕭保先所在令軍變請為備
蕭保先出刺殺之戶部使大公鼎聞亂即攝留守事與
副留守高清明集奚漢兵千人盡捕其衆斬之撫定其

民東京故渤海地太祖力戰二十餘年乃得之而蕭保
先嚴酷北海苦之故有是變其裨將渤海高永昌僭號
稱隆基元年遣蕭伊實高興順招之不從閏月己亥遣
蕭罕嘉努張琳討之戊午貴德州守將耶律伊都以廣
州渤海叛附永昌我師擊敗之二月戊辰侍御司徒托
卜嘉等討章嘉努戰于祖州敗績乙酉遣漢人行宮都
部署蕭特默率諸將討章嘉努戊子章嘉努誘饒州渤
海及中京賊侯槩等萬餘人攻陷高州三月東面行軍

副統綽哈等擒侯檠于川州夏四月戊辰親征章嘉努
癸酉敗之甲戌誅叛黨饒州渤海平丙子賞平賊將士
有差而蕭罕嘉努張琳等復為賊所敗五月清暑散水
原女直軍攻下瀋州復陷東京擒高永昌東京州縣族
人赫伯道拉烏舍托卜嘉道拉綽哈等十三人皆降女
直六月乙丑籍諸路兵有雜畜十頭以上者皆從軍庚
辰魏國王淳進封秦晉國王為都元帥上京留守蕭托
卜嘉為契丹行宮都部署兼副元帥丁亥知北院樞密

使事蕭罕嘉努為上京留守秋七月獵秋山丹州渤海
二千餘戶叛東北路統軍使勒兵追及盡俘以還八月
烏爾古部叛遣中丞耶律托卜嘉招之九月丙午謁懷
陵冬十月丁卯以張琳軍敗奪官庚辰烏爾古部降十
一月東面行軍副統瑪古等攻哈斯罕敗績十二月乙
亥封庶人蕭氏為太皇太妃辛巳削副統耶律瑪古官
七年春正月甲寅減廩馬粟分給諸局是月女直軍攻
春州東北面諸軍不戰自潰農古皮室四部及渤海人

皆降復下泰州二月涑水縣賊董龐兒聚衆萬餘西京

留守蕭伊實南京統軍都監札拉與戰于易水破之三

月龐兒黨復聚伊實復擊破之于奉聖州夏五月庚寅

東北面行軍諸將聶呼赫嚕尼格錫庫等棄市乙巳諸

圍場隙地縱百姓樵採六月辛巳以同知樞密院事額

哩葉為北院大王秋七月癸卯獵秋山八月丙寅獵錫

錫納琳山命都元帥秦晉王赴沿邊會四路兵馬防秋

九月上自燕至陰涼河置怨軍八營募自宜州者曰前

宜後宜自錦州者曰前錦後錦自乾自顯者曰乾曰顯
又有乾顯大營巖州營凡二萬八千餘人屯衛州蒺藜
山丁酉獵輞子山冬十月乙卯朔至中京十二月丙寅
都元帥秦晉國王淳遇女直軍戰于蒺藜山敗績女直
復拔顯州旁近州郡庚午下詔自責癸酉遣伊勒希巴
扎拉與大公鼎諸路募兵丁丑西京留守蕭伊實為北
府宰相東北路行軍都統奚哈瑪爾知奚六部大王事
是歲女直阿固達用鐵州楊朴策即帝位建元天輔國

號金楊朴又言自古英雄開國或受禪必先求大國封冊遂遣議和求封冊

八年春正月幸鴛鴦樂丁亥遣耶律努克等使金議和庚寅保安軍節度使張崇以雙州二百戶降金東路諸州盜賊蜂起掠民自隨以充食二月耶律努克還自金金主復書曰能兄事朕歲貢方物歸我上京中京興中府三路州縣以親王公主駙馬大臣子孫為質還我行人及元給信符并宋夏高麗往復書詔表牒則可以如

約三月甲午復遣努克使金夏四月辛酉以西南面招
討使蕭德勒岱為北院樞密使五月壬午朔努克以書
來約不踰此月見報戊戌復遣努克使金要以酌中之
議是月至納克灤賊安生兒張高兒聚衆二十萬耶律
瑪古等斬生兒于龍化州高兒亡入懿州與霍六哥相
合金主遣呼圖克與努克持書報如前約六月丁卯遣
努克等齎宋夏高麗書詔表牒至金霍六哥陷海北州
趣義州軍帥和勒博等擊敗之通祺雙遼四州之民八

百餘戶降于金秋七月獵秋山金復遣呼圖克來免取
質子及上京興中府所屬州郡裁減歲幣之數如能以
兄事朕冊用漢儀可以如約八月庚午遣努克托迪使
金議冊禮九月托迪見留遣努克還謂之曰言如不從
勿復遣使閏月丙寅遣努克復使金而蕭寶訛里等十
五人各率戶降于金冬十月努克托迪持金書來龍化
州張應古等四人率衆降金十一月副元帥蕭托卜嘉
薨十二月甲申議定冊禮遣努克使金寧昌軍節度使

劉宏以懿州戶三千降金時山前諸路大饑乾顯宜錦興中等路斗粟直數縑民削榆皮食之既而人相食是年放進士王翬等百三人

九年春正月金遣烏凌阿贊謨持書來迎冊二月辛駕鴛樂賊張薩巴誘中京射糧軍僭號南面軍帥伊都擒薩巴三月丁未朔遣知右伊勒希巴事蕭寶納埒冊金主為東懷國皇帝己酉烏凌阿贊謨努克等先以書報夏五月準布博斯齊等叛執招討使耶律鄂爾多都監

蕭錫里岱死之秋七月獵南山金復遣烏凌阿贊謨來責冊文無兄事之語不言大金而云東懷乃小邦懷其德之義及冊文有渠材二字語涉輕侮若遙芬多戢等語皆非善意殊乖體式如依前書所定然後可從楊詢卿羅子韋率衆降金八月以趙王寶訥埒為西京留守九月至西京復遣寶訥埒楊立忠先持冊藁使金冬十月甲戌朔耶律辰圖努等二十餘人謀反伏誅是月遣使送烏凌阿贊謨持書以還

十年春二月幸駕鳶灤金復遣烏凌阿贊謀持書及冊
文副本以來仍責乞兵于高麗三月己酉民有羣馬者
合取其一給東路軍庚申以金人所定大聖二字與先
世稱號同復遣實訥埒往議金主怒遂絕之夏四月獵
呼圖哩巴山聞金帥再舉耶律拜薩巴等以精兵三千
濟遼帥五月金主親攻上京克外郭留守托卜嘉率衆
山降六月己酉以北府宰相蕭伊實為上京留守知鹽
鐵內省兩司東北統軍司事秋獵沙嶺冬復至西京

遼史卷二十八

遼史卷二十八考證

天慶五年秋七月 按是年為宋徽宗政和五年宋史
書秋七月戊辰朔日食後天慶八年為徽宗重和元
年書五月壬午朔日食九年為徽宗宣和元年書夏
四月丙子朔日食十年為宣和二年書冬十月戊辰
朔日食遼紀並失載

金主復書曰歸我上京中京興中府三路州縣 按原
文作上中京據金史增

寧昌軍節度使劉宏以懿州戶三千降金 按金史亦
書劉宏屬國表作劉完又金持冊使楊立忠屬國表
作楊近忠均一人兩異其名今仍之

欽定四庫全書薈要卷六千一百五十四

遼史卷二十九

元中書右丞相總裁托克托等修

本紀第二十九

天祚皇帝三

保大元年春正月丁酉朔改元肆赦初金人興兵郡縣
所失幾半上有四子長趙王母趙昭容次晉王母文妃
次秦王許王皆元妃生國人知晉王之賢深所屬望元

妃之兄樞密使蕭奉先恐秦王不得立潛圖之文妃姊
妹三人長適耶律達哈拉次文妃次適伊都一日其姊
若妹俱會軍前奉先諷人誣駙馬蕭昱及伊都等謀立
晉王事覺昱達哈拉等伏誅文妃亦賜死獨晉王未忍
加罪伊都在軍中間之大懼即率千餘騎叛入金上遣
知奚王府事蕭錫默北府宰相蕭德恭太常袞耶律特
哩袞歸州觀察使蕭和尚努四軍太師蕭幹將所部兵
追之及諸閭山縣諸將議曰主上信蕭奉先言奉先視

吾輩蔑如也伊都乃宗室豪俊常不肯為奉先下若擒
伊都他日吾黨皆伊都也不若縱之還即給曰追襲不
及奉先即見伊都之亡恐後日諸校亦叛遂勸驟加爵
賞以結衆心以蕭錫默為奚王蕭德恭試中書門下平
章事兼判上京留守事耶律特哩袞為龍虎衛上將軍
蕭和尚努金吾衛上將軍蕭幹鎮國大將軍二月幸鴛
鴦渚夏五月至赫呀蘇秋七月獵炭山九月至南京冬
十一月癸亥以西京留守趙王實訥呀為特哩袞

二年春正月乙亥金克中京遂下澤州上出居庸關至

鴛鴦灤聞伊都引金人羅索貝勒安至蕭奉先曰伊都

乃王子班之苗裔此來欲立甥晉王耳若為社稷計不

惜一子明其罪誅之可不戰而伊都自迴矣上遂賜晉

王死素服三日耶律薩巴等皆伏誅王素有人望諸軍

聞其死無不流涕由是人心解體伊都引金人逼行宮

上率衛兵五千餘騎幸雲中遺傳國璽于桑乾河二月

庚寅朔日有食之既甲午知北院大王事耶律瑪古漢

人行宮都部署蕭特默竝為都統大和宮使耶律布達
副之將兵屯鴛鴦灤己亥金師敗奚王哈瑪爾于北安
州降其城三月辛酉上聞金師將出嶺西遂趨白水灤
乙丑羣牧使穆喇幹降金丙寅上至努庫特倉聞金兵
將近計不知所出乘輕騎入夾山方悟奉先之不忠怒
曰汝父子誤我至此今欲誅汝何益于事恐軍心忿忿
爾曹避敵苟安禍必及我其勿從行奉先下馬哭拜而
去行未數里左右執其父子縛送金兵金人斬其長子

昂以奉先及其次子昱械送金主道遇遼軍奪以歸國
遂竝賜死逐樞密使蕭德劬岱召托卜嘉典禁衛丁卯
以北院樞密副使蕭僧孝努知北院樞密使事同知北
院樞密使事蕭扎拉為左伊勒希巴戊辰同知殿前點
檢事耶律果巴率衛士降金己巳偵人蕭和尚牌印郎
君耶律希肆為金所獲癸酉以諸局百工多亡凡扈從
不限吏民皆官之初詔留宰相張琳李處溫與秦晉國
王淳守燕處溫聞上入夾山數日命令不通即與弟處

能子奭外假怨軍內結都統蕭幹謀立淳遂與諸大臣
耶律達實左企弓虞仲文曹勇義康公弼集蕃漢百官
諸軍及父老數萬人詣淳府處溫邀張琳至白其事琳
曰攝政則可處溫曰天意人心已定請立班耳處溫等
請淳受禮淳方出李奭持赭袍被之令百官拜舞山呼
淳驚駭再三辭不獲已而從之以處溫守太尉左企弓
守司徒曹勇義知樞密院事虞仲文參知政事張琳守
太師李處能直樞密院李奭為少府少監提舉翰林醫

官李爽陳秘十餘人曾與大計竝賜進士及第授官有

差蕭幹為北樞密使駙馬都尉蕭旦知樞密院事改怨
軍為常勝軍於是肆赦自稱天錫皇帝改元建福降封
天祚為湘陰王遂據有燕雲平及上京遼西六路天祚
所有沙漠已北西南西北路兩都招討府諸蕃部族而
已夏四月辛卯西南面招討使耶律佛騰降金雲內寧
邊東勝等州皆降阿蘇為金兵所擒金已取西京沙漠
以南部族皆降上遂遁於額蘇掄時北部瑪克實賸馬

馳食羊五月甲戌都統瑪古收集散亡會于額勒錦丙
子以瑪古知北院樞密使事兼都統六月淳寢疾聞上
傳檄天德雲內朔武應蔚等州合諸蕃精兵五萬騎約
以八月入燕并遣人問勞索衣裘茗藥淳甚驚命南北
面大臣議而李處溫蕭幹等有迎秦拒湘之說集蕃漢
百官議之從其議者東立惟南面行營都部署耶律寧
西立處溫等問故寧曰天祚果能以諸蕃兵大舉奪燕
則是天數未盡豈能拒之否則秦湘父子也拒則皆拒

自古安有迎子而拒其父者處溫等相顧微笑以寧扇
亂軍心欲殺之淳歆枕長歎曰彼忠臣也焉可殺天祚
果來吾有死耳復何面目相見耶已而淳死衆乃議立
其妻蕭氏為皇太后主軍國事奉遺命迎立天祚次子
秦王定為帝太后遂稱制改元德興處溫父子懼禍南
通童貫欲挾蕭太后納土于宋北通于金欲為內應外
以援立大功自陳蕭太后罵曰誤秦晉國王者皆汝父
子悉數其過數十賜死齎其子頭而磔之籍其家得錢

七萬緡金玉寶器稱是為宰相數月之間所取也瑪克
實以兵來援為金人敗于鴻輝水擒其子托果及其屬
阿敦夏國援兵至亦為金兵所敗秋七月丁巳德呼勒
部皮室叛烏爾古部節度使耶律唐古討平之加太子
太保乙丑上京茂巴克實率二千戶降金辛未夏國遣
曹介來問起居八月戊戌親遇金軍戰于石輦驛敗績
都統蕭特默及其姪沙古被執辛丑會軍于歡塔察拉
金兵追之棄輜重以遁九月德呼勒部叛都統瑪古克

之冬十月金兵攻蔚州降十一月乙丑聞金兵至奉聖
州率衛兵屯于羅克綏秦晉王淳妻蕭德妃五上表于
金求立秦王不許以勁兵守居庸及金兵臨關厓石自
崩戍卒多壓死不戰而潰德妃出古北口趨天德軍十
二月知金主撫定南京上遂由薩里關出居四部族詳
袞之家

三年春正月丁巳奚王和勒博僭號稱天復元年命都
統瑪古討之甲子初張穀為遼興軍節度使事民推穀

領州事秦晉王淳既死蕭德妃遣錫凌阿知平州穀知
遼必亡練兵畜馬籍丁壯為備錫凌阿至弗納金帥尼雅
滿入燕首問平州事於故參知政事康公弼公弼曰穀
狂妄寡謀雖有鄉兵彼何能為示之不疑圖之未晚金
人招錫凌阿赴軍前加穀臨海軍節度使仍知平州既
而又欲以精兵三千先下平州擒張穀公弼曰若加兵
是趣之叛也公弼請自往覘之穀謂公弼曰遼之八路
七路已降獨平州未解甲者防蕭幹耳厚賂公弼而還公

弼復尼雅滿曰彼無足慮金人遂改平州為南京加穀
試中書門下平章事判留守事庚辰宜錦乾顯成川豪
懿等州相繼皆降上京盧彥綸叛殺契丹人二月乙酉
朔興中府降金來州歸德軍節度使田顥權隰州刺史
杜師回權遷州刺史高永昌權閏州刺史張成皆籍所
管戶降金丙戌誅蕭德妃降淳為庶人盡釋其黨癸巳
興中宜州復城守三月駐蹕于雲內州南夏四月甲申
朔以知北院樞密使蕭僧孝努為諸道大都督丙申金

兵至居庸關擒耶律達石戊戌金兵圍輜重于青塚硬

寨太保特默格竊梁王雅里以遁秦王許王諸妃公主

從臣皆陷沒庚子梁宋大長公主特哩亡歸壬寅金遣

人來招癸卯答言請和丙午金兵送族屬輜重東行乃

遣兵邀戰于白水灤趙王實納埒蕭道寧被執上遣牌

印郎君摩勒幹送兔紐金印偽降遂西遁雲內駙馬都

尉瑞諾爾詣金降己酉金復以書來招答其書壬子金

帥書來不許請和是月特默格挈雅里至上怒不能盡

救諸子詰之五月乙卯夏國王李乾順遣使請臨其國
庚申軍將耶律迪里等夜劫梁王雅里奔西北部立以
為帝改元神厯辛酉渡河止于金肅軍北和勒博為衆
所殺六月遣使冊李乾順為夏國皇帝秋九月耶律達
實自金來歸冬十月復渡河東還居圖魯卜部梁王雅
里歿耶律珠拉繼之十一月圖烈為衆所殺

四年春正月上趨都統瑪古軍金人來攻棄營北遁瑪
古被執瑪克實來迎贐馳馬食羊率部人防衛時侍從

乏糧以衣易羊至烏爾古德呼勒部以都點檢蕭伊實
知北院樞密使事封瑪克實為神裕悅王特默格降金
二月耶律約蘇等十人謀叛伏誅夏五月金人既克燕
驅燕之大家東徙以燕空城及涿易檀順景薊州與宋
以塞盟左企弓康公弼曹勇義虞仲文皆東遷燕民流
離道路不勝其苦入平州言於留守張穀曰宰相左企
弓不謀守燕使吾民流離無所安集公今臨巨鎮握強
兵盡忠於遼必能使我復歸鄉土人心亦惟公是望穀

遂召諸將領議皆曰聞天祚兵勢復振出沒漠南公若仗義勤王奉迎天祚以圖中興先責左企弓等叛降之罪而誅之盡歸燕民使服其業而以平州歸宋則宋無不接納平州遂為藩鎮矣即後日金人加兵內用平州之軍外得宋為之援又何懼焉

鼓曰此大事也不可草草翰林學士李石智而多謀可召與議石至其言與之合乃遣張謙率五百餘騎傳留守令召宰相左企弓曹勇義樞密使虞仲文參知政事康公弼至灤河西岸邊議事官趙秘校往數十罪曰天祚播遷夾山不即奉迎

一也勸皇叔秦晉王僭號二也詆訐君父降封湘陰三也天祚遣知閣王有慶來議事而殺之四也檄書始至有迎秦拒湘之議五也不謀守燕而降六也不顧大義臣事于金七也根括燕財取悅于金八也使燕人遷徙失業九也教金人發兵先下平州十也爾有十罪所不容誅左企弓等無以對皆縊殺之仍稱保大三年盡天祚象朝夕謁事必告而後行稱遼官秩六月榜諭燕人復業恒產為常勝軍所占者悉還之燕民既得歸大悅

翰林學士李石更名安弼偕故三司使高黨往燕山說

宋王安中曰平州帶甲萬餘穀有文武材可用為屏翰
不然將為肘腋之患安中深然之令安弼與黨詣宋宋
主詔帥臣王安中詹度厚加安撫與免三年常賦穀聞
之自謂得計秋七月金人屯來棟棟摩聞平州附宋以
二千騎問罪先入營州穀以精兵萬騎擊敗之宋建平
州為泰寧軍以穀為節度使以安弼黨為徽猷閣待制
令宣撫司出銀絹數萬犒賞穀喜遠迎金人謀知舉兵

來襲穀不得歸奔燕金人克三州始來索穀王安中諱之索急斬一人貌類者去金人曰非穀也以兵來取安中不得已殺穀函其首送金天祚既得林牙耶律達實兵歸又得陰山室韋瑪克實兵自謂得天助再謀出兵復收燕雲達實林牙力諫曰自金人初陷長春遼陽則車駕不幸廣平淀而都中京及陷上京則都燕山及陷中京則幸雲中自雲中而播遷夾山向以全師不謀戰備使舉國漢地皆為金有國勢至此而方求戰非計也

當養兵待時而動不可輕舉不從達實遂殺伊實及博勒和置北南面官屬自立為王率所部西去上遂率諸軍出夾山下漁陽嶺取天德東勝寧邊雲內等州南下武州遇金人戰于昂阿下水復潰直趨山陰八月國舅詳袞蕭托卜嘉筆硯祇候察喇降金是月金主阿固達死九月建州降金冬十月納圖魯卜部人額爾克之妻阿克以額爾克為本部節度使扎古雅降金金攻興中府降之十一月從行者舉兵亂北護衛太保珠展舍利

詳衮額布勒等擊敗之十二月置二總管府

遼史卷二十九

遼史卷二十九考證

若擒伊都 按伊都即前後原文余覩此作余都又都
統蕭幹訛蕭幹俱畫一改

保大二年二月庚寅朔日有食之既 按遼自太祖至
此凡二百十餘年所書日食止二十九史臣於厯象
志云日食星變風雲震雪之祥具載帝紀乃質之新
舊唐書五代史宋史及契丹國志等書遼紀獨畧再
考保大二年為徽宗宣和四年宋史於二月庚寅朔

未書日食此又宋史之闕

遣議事官趙秘校往數十罪

按契丹國志作趙能

遼史卷二十九考證

欽定四庫全書薈要卷六千一百五十五

遼史卷三十

元中書右丞相總裁托克托等修

本紀第三十

天祚皇帝四

五年春正月辛巳党項小呼嚕遣人請臨其地戊子趨
天德過沙漠金兵忽至上徒步出走近侍進珠帽却之
乘張仁貴馬得脫至天德己丑遇雪無禦寒具珠展以

貂裘帽進途次絕糧珠展進麩與棗欲憇珠展即跪生
倚之假寐珠展革惟齧冰雪以濟饑過天德至夜將宿
民家給曰偵騎其家知之乃叩馬首跪而大慟潛宿其
家居數日嘉其忠遂授以節度使遂趨党項以小呼嚕
為西南面招討使總知軍事仍賜其子及諸校爵賞有
差二月至應州新城東六十里為金人完顏羅索等所
獲八月癸卯至金丙午降封海濱王以疾終年五十有
四在位二十四年金皇統元年二月改封豫王五年葬

于廣寧府閭陽縣乾陵傍耶律淳者世號為北遼淳小
字聶呼興宗第四孫南京留守宋魏王和囉嚕之子清
寧初太后鞠育之既長篤好文學昭懷太子得罪上欲
以淳為嗣上怒耶律拜薩巴知與淳善出淳為彰聖等
軍節度使天祚即位進王鄭乾統二年加越王六年拜
南府宰相首議制兩府禮儀上喜從王魏其父和囉嚕
薨即以淳襲父守南京冬夏入朝寵冠諸王天慶五年
東征都監章努濟鴨子河與淳子阿薩爾等三百餘人

亡歸先遣迪里以廢立之謀報淳淳斬迪里首以獻進
封秦晉國王拜都元帥賜金券免漢拜禮不名許自擇
將士乃募燕雲精兵東至錦州隊長武朝彥作亂劫淳
淳匿而免收朝彥誅之會金兵至聚兵戰于阿爾展圖
敗績收亡卒數千人拒之淳入朝釋其罪詔南京刻石
紀功保大二年天祚入夾山奚王和勒博林牙耶律達
實等引唐靈武故事議欲立淳淳不從官屬勸進曰主
上蒙塵中原擾攘若不立王百姓何歸宜熟計之遂即

位百官上號天錫皇帝改保大二年為建福元年大赦
放進士李寶信等一十九人遙降天祚為湘陰王以燕
雲平上京中京遼西六路淳主之沙漠以北南北路兩
都招討府諸蕃部族等仍隸天祚自此遼國分矣封其
妻普賢女為德妃以和勒博知北院樞密使事軍族之
事悉委達實又遣使報宋免歲幣結好宋人發兵問罪
擊敗之尋遣使奉表于金乞為附庸事未決淳病死年
六十百官偽謚曰孝章皇帝廟號宣宗葬燕西香山永

安陵遺命還立秦王定以存社稷德妃為皇太后稱制
改建福為德興元年放進士李球等百八人時宋兵來
攻戰敗之由是人心大悅兵勢日振宰相李純等潛納
宋兵居民內應抱關者被殺甚衆翌日攻內東門衛兵
力戰宋軍大潰踰城而走死者相籍五表于金求立秦
王不從而金兵大至德妃奔天德軍見天祚天祚怒誅
德妃降淳熙人除其屬籍耶律雅里者天祚皇帝第二
子也字薩蘭七歲欲立為皇太子別置禁衛封梁王保

大三年金師圍青塚寨雅里在軍中太保特默格挾之
出走間道行至陰山聞天祚失利趨雲內雅里馳赴時
扈從者千餘人多於天祚天祚慮特默格生變欲誅之
責以不能全救諸王將訊之仗劍召雅里問曰特默格
教汝何為雅里對曰無他言迺釋之天祚渡河奔夏隊
帥耶律迪里等劫雅里北走至沙嶺見蛇橫道而過識
者以為不祥後三日羣僚共立雅里為主雅里遂即位
改元神歷命士庶上便宜雅里性寬大惡誅殺獲亡者

答之而已有自歸者即官之因謂左右曰欲附來歸不
附則去何須威逼耶每取唐貞觀政要及林牙資忠所
作治國詩令侍從讀之烏爾古部節度使扎扎德呼勒
部統軍扎卜嘉都監圖魯卜等率衆來附自是諸部繼
至而雅里日漸荒怠好擊鞠特默格切諫乃不復出以
耶律迪里為樞密使特默格副之耶律達實者世號為
西遼太祖八代孫也天祚責達實曰我在汝何敢立淳
對曰即立十淳皆太祖子孫豈不勝乞命於他人耶上

無以答賜酒食赦其罪達實不自安遂自立為王率
鐵騎二百宵遁北行三日過黑水見白達勒達詳袞崇
烏嚕崇烏嚕獻馬四百駝二十羊若干西至哈屯城駐
北庭都護府會威武崇德會蕃新大林紫河駝等七州
及大黃室韋德呼勒昂吉爾察察哩約喜布古德尼勒
塔喇貴達瑪勒默爾吉和卓烏庫哩準布博克碩寬唐
古呼穆蘇希達濟勒貝十八部王衆諭曰我祖宗艱難
創業歷世九主歷年二百金以臣屬殘毒我黎庶屠翦

我州邑使我天祚皇帝蒙塵于外日夜痛心疾首我今
伏羲而西欲借力諸蕃翦我仇敵復我疆宇惟爾衆亦
有軫我國家憂我社稷思共救君父濟生民於難者乎
遂得精兵萬餘置官吏立排甲具器仗明年二月甲午
以青牛白馬祭天地祖宗整旅而西先遺書輝和爾王
畢理克曰昔我太祖皇帝北征過巴噶罕城遣使至甘
州詔爾祖烏穆珠曰汝思故國耶朕即為汝復之汝不
能返耶朕則有之在朕猶在爾也爾祖即表謝以為遷

國于此十有餘世軍民皆安土重遷不能復返矣是與

爾國非一日之好也令我將西至大食假道爾國其勿

致疑畢理克得書即迎至邸大宴三日臨行獻馬六百

駝百羊三千願質子孫為附庸送至境外所過敵者勝

之降者安之兵行萬里歸者數國獲駝馬牛羊財物不

可勝計軍勢曰盛銳氣曰倍至塔什干西域諸國舉兵

十萬號呼喇繖來拒戰兩軍相望二里許諭將士曰彼

軍雖多而無謀攻之則首尾不救我師必勝遣六院司

大王蕭額哩呼招討副使耶律松山等將兵二千五百
攻其右樞密副使蕭扎倫布招討使耶律穆蘇等將兵
二千五百攻其左自以衆攻其中三軍俱進呼喇織大
敗僵屍數十里駐軍塔什干凡九月回回國王來降貢
方物又西至奇爾瑪勒文武百官冊立達實為帝以甲
辰歲二月五日即位年三十八號噶爾漢復上漢尊號
曰天祐皇帝改元延慶追謚祖父為嗣元皇帝祖母為宣
義皇后冊元妃蕭氏為昭德皇后因謂百官曰朕與

卿等行三萬里跋涉沙漠夙夜艱勤賴祖宗之福卿等
之力冒登天位爾祖爾父宜加卹典共享尊榮自蕭額
哩埒等四十九人祖父賜爵有差延慶三年班師東歸
馬行二十日得善地遂建都城號呼遜鄂爾多改延慶
為康國元年三月以六院司大王蕭額哩埒為兵馬都
元帥德呼勒部前同知樞密院事蕭札倫布副之察察
哩部圖魯耶律燕山為都部署護衛耶律特爾格為都
監率七萬騎東征以青牛白馬祭天樹旗以誓衆曰我

大遼自太祖太宗艱難而成帝業其後嗣君耽樂無厭
不恤國政盜賊蠭起天下土崩朕率爾衆遠至朔漠期
復大業以光中興此非朕與爾世居之地申命元帥額
哩埒曰今汝其往信賞必罰與士卒同甘苦擇善水草
以立營量敵而進毋自取禍敗也行萬餘里無所得牛
馬多死勒兵而還達實曰皇天弗順數也康國十年歿
在位二十年廟號德宗子伊立年幼遺命皇后權國后
名塔布延號感天皇后稱制改元咸清在位七年子伊

立即位改元紹興籍民十八歲以上得八萬四千五百
戶在位十三年歿廟號仁宗子幼遺詔以妹博克碩寬
權國稱制改元崇福號承天太后後與駙馬蕭國魯卜
弟巴噶濟蘇爾通出駙馬為東平王羅織殺之駙馬父
額哩埒以兵圍其宮射殺博克碩寬及巴噶濟蘇爾博
克碩寬在位十四年仁宗次子珠勒呼即位改元天禧
在位三十四年時秋獵奈曼王庫楚埒伏兵八千擒之
據其位遂襲遼衣冠尊珠勒呼為太上皇皇后為皇太

后朝夕問起居以侍終焉珠勒呼死遼絕耶律淳在天

祚之世歷王大國受賜金券贊拜不名一時恩遇無與
為比當天祚播越以都元帥留守南京獨不可奮大義
以激燕民及諸大臣興勤王之師東拒金而迎天祚乎
乃自取之是篡也况忍王天祚哉達實既帝淳而王天
祚矣復歸天祚天祚責以大義乃自立為王而去之幸
藉祖宗餘威遺智建號萬里之外雖寡母弱子更繼迭
承幾九十年亦可謂難矣然淳與雅里達實之立皆在

天祚之世有君而復君之其可乎哉諸葛武侯為獻帝
發喪而後立先主為帝者不可同年語矣故著以為戒
云

贊曰遼起朔野兵甲之盛鼓行竅外席卷河朔樹晉楨
漢何其壯歟太祖太宗乘百戰之勢輯新造之邦英謀
獻畧可謂遠矣雖以世宗中才穆宗殘暴連遘弒逆而
神器不搖蓋由祖宗威令猶足以震疊其國人也聖宗
以來內脩政治外拓疆宇既而申固鄰好四境乂安維

持二百餘年之基有自來矣降臻天祚既丁未運又缺
人望崇信姦回自掇國本羣下離心金兵一集內難先
作廢立之謀叛亡之迹相繼蠡起馴致土崩瓦解不可
復支良可哀也耶律與蕭世為甥舅義同休戚奉先挾
私滅公首旤構難一至於斯天祚窮蹙始悟奉先誤已
不既晚乎淳雅里所謂名不正言不順事不成者也達
實苟延彼善於此亦幾何哉

遼史卷三十

欽定四庫全書

總校官原候補知府臣葉佩蓀

校對官編修臣吳錫麒

謄錄監生臣孫樹新

欽定四庫全書薈要

史部
遼史卷三十一至五

詳校官祭酒臣韋謙恒



欽定四庫全書薈要卷六千一百五十六

遼史卷三十一

元中書右丞相總裁托克托等修

第一

營衛志上

上古之世草衣木食巢居穴處熙熙于于不求不爭爰
自炎帝政衰蚩尤作亂始制干戈以毒天下軒轅氏作
戮之涿鹿之阿處則象吻于宮行則懸旌于纛以爲天

下萬世戒於是師兵營衛不得不設矣冀州以南歷洪水之變夏后始制城郭其人土著而居綏服之中外奮武衛內揆文教守在四邊營衛之設以備非常而已并營以北勁風多寒隨陽遷徙歲無寧居曠土萬里寇盜乘隙而作營衛之設以爲常其勢然也有遼始大設制尤密居有宮衛謂之鄂爾多出有行營謂之巴納分鎮邊圉謂之部族有事則以攻戰爲務閒暇則以畋漁爲生無日不營無在不衛立國規模莫重於此作營衛志

宮衛

遼國之法天子踐位置宮衛分州縣析部族設官府籍戶口備兵馬崩則扈從后妃宮帳以奉陵寢有調發則丁壯從戎事老弱居守太祖曰弘義宮應天皇后曰長寧宮太宗曰永興宮世宗曰積慶宮穆宗曰延昌宮景宗曰彰愍宮承天太后曰崇德宮聖宗曰興聖宮興宗曰延慶宮道宗曰太和宮天祚曰永昌宮又孝文皇太弟有敦睦宮丞相耶律隆運有文忠王府凡州三十八

縣十提轄司四十一錫林二十三幹里七十四摩哩九十八德里二扎薩克十九爲正戶八萬蕃漢轉戶十二萬三千共二十萬三千戶

蘇幹延阿爾多太祖置國語心腹曰蘇幹延宮曰鄂爾多是爲弘義宮以心腹之衛置益以渤海俘錦州戶其鄂爾多在臨潢府陵寢在祖州東南二十里正戶八千蕃漢轉戶七千出騎軍六千

州五錦祖嚴祺銀

縣一富義

提轄司四南京西京奉聖州平州

錫林二曰舒曰蘇嚕克

幹里四曰赫伯曰達薩曰默音曰呼沁

摩哩四曰珊曰伊都曰呼圖克曰吉勒展

德里二曰實壘北曰實壘南

穀烏寧鄂爾多太宗置牧圍曰穀烏寧是爲永興宮初
名沽依鄂爾多以太祖平渤海俘戶東京懷州提轄司

及雲州懷仁縣澤州灤河縣等戶置其鄂爾多在伊庫
河側陵寢在懷州南三十里正戶三千蕃漢轉戶七千
出騎軍五千

州四懷黔開來

縣二保和灤河

提轄司四南京西京奉聖州平州

錫林一北孟古

幹里四曰茂曰烏曰哈喇齊曰寶壘

摩哩十三曰蕪爾展曰大格密曰小格密曰烏
曰歸化布木曰唐古曰圖格曰伯爾克圖曰
和掄布展曰伊綿布展曰珊曰青達曰索雲
扎薩克七曰伯特部曰舒蕪曰錫庫爾齊曰赫
貝巴納曰呼魯蕪曰耶律濟沙實克曰賽音
令公

伊囉幹鄂爾多世宗置興盛曰伊囉幹是爲積慶宮以
文獻皇帝衛從及太宗俘戶及雲州提轄司并高宜等

州戶置其鄂爾多在土河東陵寢在長寧宮北正戶五千蕃漢轉戶八千出騎軍八千

州三康顯宜

縣一山東

提轄司四

錫林一實喇

幹里八曰達薩曰赫伯曰錫呼曰必老曰塔瑪
曰綽卜曰伊呼濟曰伊呼烏頁

摩哩十曰格蘓齊曰莽阿曰濟里曰塔瑪圖曰
楚勒罕曰薩哈廉溫曰達勒達曰伊瑪曰德
勒岱曰孟古

富僧額鄂爾多應天皇太后置興隆曰富僧額是爲長
寧宮以遼州及海濱縣等戶置其鄂爾多在高州陵寢
在龍化州東一百里世宗分屬讓國皇帝宮院正戶七
千蕃漢轉戶六千出騎軍五千

州四遼儀坤遼西顯

縣三奉先歸義定霸

提轄司四

錫林一北孟古

幹里六曰塔瑪曰赫伯曰達薩曰默音曰伊呼

濟曰罕札

摩哩十三曰哈達阿林刷沃濟曰哈克繖必賚

達勒拜刷沃濟曰圖嚕勒奇曰納噶特齊曰

哈喇齊曰博勒和庫們曰阿嚕音達巴曰東

錫勒們曰西錫勒們曰東齊哩克曰西齊哩
克曰達爾札曰瑪烏楞古

岱拉哈鄂爾多穆宗置是爲延昌宮討平曰岱拉哈以
穀烏寧鄂爾多戶及準布俘戶中京提轄司南京制置
司咸信韓等州戶置其鄂爾多在嘉哩山南陵寢在京
南正戶一千蕃漢轉戶三千出騎軍二千

州二 遂韓

提轄司三中京南京平州

錫林一曰舒

幹里四曰茂古庫德曰鄂摩曰塔瑪曰哈喇齊
摩哩四曰穆克德珂鄂摩曰特默齊鄂蘭曰息
州濟里曰摩該都爾蘇

嘉們鄂爾多景宗置是爲彰愍宮遺留曰嘉們以章肅
皇帝侍衛及武安州戶置其鄂爾多在赫魯河陵寢在
祖州南正戶八千番漢轉戶一萬出騎軍一萬

州四永龍化降聖同

縣二行唐阜俗

提轄司四

錫林二曰嘉們曰南孟古

幹里七曰塔瑪曰實喇曰威哈喇齊曰瑪雅喀

曰特默曰烏頁曰穆爾哈喇齊

摩哩十一曰額穆吉林刷沃濟曰察罕穆爾

達巴曰伊奇哩沃濟曰色克布展曰薩哈

勒齊曰伊克扎木曰呼遜阿林曰布琨曰

塔瑪曰扎蘭曰徹辰郭勒

沽依鄂爾多承天太后置是爲崇德宮王名曰沽以乾
顯雙三州戶置其鄂爾多在土河東陵祔景宗皇帝正
戶六千蕃漢轉戶一萬出騎軍一萬

州四乾川雙貴德

縣一路
上京

提轄司三南京西京奉聖州

錫林三曰齊哩克曰帕克曰特哩台孟古

幹里七曰達薩曰伊里曰赫伯曰錫伯曰哈喇
齊曰默音曰伊呼濟

摩哩十一曰教拉森濟實壘曰伊勒敦刷沃濟
曰塔瑪曰伊蘭伊勒都堪阿克曰伊克扎木
曰達爾扎曰瑚琨曰袞曰色呼森曰阿掄哈
斯郭勒曰特哩袞齊哩克

扎薩克五曰古卜齊默爾根巴納曰達爾罕太
保果齊喀曰卦安巴果齊喀曰賽音令公果

齊喀曰羅和令公果齊喀

孟古鄂爾多聖宗置是爲興聖宮金曰孟古以穀烏寧
伊囉幹富僧額三鄂爾多戶置其鄂爾多在紐歎賀珍
陵寢在慶州南安正戶一萬蕃漢轉戶二萬出騎軍五
千

州五慶隰烏上京烏東京霸

提轄司四

錫林四曰浩沁孟古曰約沁諾色爾曰紐爾特

哩台曰尼格巴爾

幹里六曰孟古富僧額曰呼都克為伊德曰旺
曰阿雅

摩哩九曰伊錫布展曰特古斯琨曰威哈喇齊
曰綽哈曰哈喇織錫庫爾齊曰多托喇班錫
庫爾齊曰魯庫曰希斯曰都林

扎薩克五曰達林巴納曰和倫巴納曰卦安巴
覺禪曰烏爾都爾蘇曰礮達古魯克齊

阿敦鄂爾多興宗置是爲延慶宮孳息曰阿敦以諸鄂
爾多及饒州戶置其鄂爾多在高州西陵寢在上京慶
州正戶七千蕃漢轉戶一萬出騎軍一萬

州三饒長春泰

提轄司四

錫林二曰阿敦曰呼都克

幹里六曰阿敦曰薩巴曰薩曰扎賚曰德里曰

敖拉

摩哩六曰額勒本曰雅蘓曰默色曰伊繖曰北
德里曰南德里

阿果鄂爾多道宗置是爲太和宮寬大曰阿果以諸鄂
爾多御前承應人及興中府戶置其鄂爾多在好水樂
陵寢在上京慶州正戶一萬蕃漢轉戶二萬出騎軍一
萬五千

錫林二曰阿蘓曰頁嚕

幹里八曰阿蘓曰頁嚕曰德里曰扎賚曰薩布

曰呼都克曰富僧額曰哈里

摩哩七曰恩州德里曰額森德勒曰額勒本曰
特們曰庫爾都哩曰扎賚曰額呼蘓穆爾

阿掄鄂爾多天祚皇帝置是爲永昌宮輔祐曰阿掄以
諸鄂爾多御前承應人春宣州戶置正戶八千番漢轉
戶一萬出騎軍一萬

錫林二曰阿掄曰伊囉幹

幹里八曰阿嚕威曰哈哩雅曰呼都克曰達喇

曰穆喇幹曰扎賚曰圖魯拉曰特默

摩哩八曰富森額曰伊納克曰武都溫曰特們
曰穆勒幹曰伊特丹曰雲曰布圖巴

孝文皇太弟敦睦宮謂之學順德哩本鄂爾多孝曰學
順德哩本文獻皇帝承應人及渤海俘建瀋巖三州戶
置陵寢在祖州西南三十里正戶三千蕃漢轉戶五千
出騎軍五千

州三建瀋巖

提轄司一南京

錫林二曰超曰伊都

幹里六曰伊遜曰德里曰錫里濟曰大塔瑪曰

小塔瑪曰伊都

摩哩二曰特默茂海曰婁實克

扎薩克二曰聶呼巴納曰達蘭巴納

大丞相晉國王耶律隆運本韓氏名德讓以功賜國姓
出宮籍隸橫帳季父房贈尚書令謚文忠無子以皇族

魏王特布子頁嚕爲嗣早卒天祚皇帝又以皇子額嚕
溫繼之官給葬具建廟乾陵側擬諸宮例建文忠王府
正戶五千蕃漢轉戶八千出騎軍一萬

州一

提轄司六上京中京南京西京奉聖州平州

著帳郎君

著帳郎君初約尼哈陶津汗以特果濟等三族害裕悅
實魯籍沒家屬入斡里淳欽皇后宥之以爲著帳郎君

世宗悉免後族戚世官犯罪者沒入

著帳戶

著帳戶本諸鄂爾多析出及諸罪沒入者凡承應小底司藏鷹坊湯藥尚飲盥漱尚膳尚衣裁造等役及宮中親王祇從伶官之屬皆充之

凡諸宮衛人丁四十萬八千騎軍十萬一千著帳釋宥沒入隨時增損無常額

遼史卷三十一

遼史卷三十一考證 營衛志上

蘓幹延鄂爾多 原文作算幹魯朶心腹曰算蘓幹延
則非心腹之義詳見國語解前人不諳音譯今既改
國語於漢文未可牽合傳會故兩存焉他倣此

穀烏寧鄂爾多太宗置牧圉曰穀烏寧 按牧圉原文
訛牧國於義難通今據舊遼國語解改穀烏寧原文
作國阿鞏今改爲穀烏寧語義詳國語解與牧圉義
亦相近

穀烏寧鄂爾多隸州四懷黔開來 按地理志永興宮

所隸有瀋州建州後屬敦睦宮至東京開州下並無
隸永興之文兩志所載互異

縣二保和梁河 按地理志上京道保和縣隸彰愍宮
與此異

幹里四其三曰哈喇齊 舊作合李只本卷長寧宮條
作合里只延昌宮條作合至直崇德宮條作合里直
今併改哈喇齊

伊囉幹鄂爾多 原文作耶魯盃幹魯朶興盛曰耶魯

盃伊囉幹則非興盛之義詳見國語解

富僧額鄂爾多 原文作蒲速盃幹魯朶興隆曰蒲速

盃富僧額則非興隆之義詳見國語解

岱拉哈鄂爾多隸州二遂韓 按地里志延昌宮所隸

有雙州後改隸崇德宮故不載

嘉們鄂爾多 原文作監母幹魯朶遺留曰監母嘉們

則非遺留之義詳見國語解

孟古鄂爾多隸幹里六 按興聖宮幹里六史祇載地

名五而逸其一他書無可互証仍闕疑

阿敦鄂爾多 原文作窩篤盪幹魯朶孛息曰窩篤盪

阿敦則非孛息之義詳見國語解

阿掄鄂爾多 原文作阿魯盪幹魯朶輔祐曰阿魯盪

阿掄則非輔祐之義詳見國語解

學順德哩本鄂爾多 原文作赤實得本幹魯朶孝曰

赤實得本學順滿洲語孝也德哩本與原義不符詳

見國語解

遼史卷三十一考證